

Bandanan di brug nobo Pos Chikito a conecta na otro

ORANJESTAD – Pa lunanan ta trahando riba e pianan di e brug nobo. Matanan a wordo kita pa asina por a construi e pianan di brug. E pianan a bay halto te cu awo e bandanan di e brug nobo a yega na otro.

Esaki ta e comunicado cu gobierno a manda:

Como parti di proyecto ‘Green Corridor’ e brug cu ta bay carga e ‘Vierbaansweg, over di Spaans Lagoen a yega un punto crucial. For di oranan tempran di mainta, tabata tin un grupo grandi di hende riba e caminda grandi na altura di Pos Chikito caminda cu nan tabata warda pa e ultimo pida di un di e ‘boog nan’ di e brug yega su luga pa asina e keda completa.

E trabou ta un ‘precisiewerk’ manera un di e ingenieronan di DOW presente a splica. E margen pa eror den e tipo di



trabounan aki ta practicamente cero. Pa banda di 8:25 di mainta, e trahadonan di ODINSA tabata asina leu cu nan a completa e parti mas pazuid di e brug.

Prome Minister Mike Eman y su colega minister encarga cu infraestructura tambe tabata presente pa e ocasion aki. Prome Minister Eman a subi parti di e brug cu un bandera di Aruba den su man y a pasa esaki pa un di e trahadonan specialisa cu tabata trahando na e momento ey.

E trahado aki a pone e bandera na e punto di mas hanto di e brug nobo.

Ta planea pa e parti panort di e brug tambe keda completa pa diamars awor. □

